

CONCILIVM PROVIN. COLONIEN.

dit de ore dei. Cibus exterior carnem tantum mortalem reficit, & intrans per os, in ventrem vadit, & in secessum emittitur; Panis autem spiritus tam per verbum prædicationis, quam sacramentaliter in veritate corporis & sanguinis dominici, in viuâ fide comestus, viuificat, reficit, ac vegetat animam, qui non perit, sed permanet in vitam æternam, & hunc qui ederit, non morietur in æternum. Id quod omnes pijs sciunt ac sentiunt, Viuus enim sermo dei est, & efficax, & penetrantior quouis gladio ancipiti, ac pertingens vsque ad diuisionem animæ & spiritus, compagumq; & medullarum.

Fidelitas in primis in parcho requiritur. Cap. III.

**H**ic iam inter huius cœlestis panis dispensatores quæritur, vt fidelis quis inueniatur. Fidelis, inquam, seruus & prudens, quem constituit dominus super familiam suam, vt det illis escam in tempore. Beatus ille seruus, quem, quum venerit dominus eius, inuenerit sic facientem. Sin secus, veniet dominus serui illius, in die quo non sperat, & hora quam ignorat, & diuidet eum, partemq; eius ponet cum hypocritis, vbi erit fletus & stridor dentium.

Quis sit fidelis verbi dispensator. Cap. III.

**I**s autem fidelis est dispensator, (attestante diuinissimo Iohanne) cuius scopus vnicus ille Christus est, & cuius spiritus confitetur Christum in carne venisse, id est, vt diuus Paulus interpretatur, qui docet apparuisse gratiam dei & saluatoris nostri omnibus hominibus ad erudiendum nos, vt abnegantes omnem impietatem & secularia desideria, sobrie, iuste, & pie viuamus in hoc seculo, expectantes beatam spem & aduentum gloriæ magni dei & saluatoris nostri Iesu Christi. Qui, inquam, docet eundem Christum Iesum dominum nostrum hominem factum, vt daret semetipsum pro nobis, vt nos redimeret ab omni iniquitate, & mundaret sibi populum acceptabilem, sectatorem bonorum operum. Quibus verbis sanctus Paulus duas in Christo naturas, verbi scilicet & carnis indissolubili vinculo cohærentes, & vtriusque naturæ rationem complectitur, Verbi, quatenus erudit nos, docens quæ sit voluntas patris, quam facientibus denuntiat præmium, præuaricantibus vero pœnam æternam. Carnis vero, quatenus datus & immolatus est pro nobis in ara crucis. Agnus immaculatus & victima tollens peccata mundi, nobis relinquens exemplum, vt sequamur vestigia eius, & eadem cogitatione armemur, quia qui passus est in carne, desit a peccatis, vt iam non desiderijs hominum, sed voluntate dei, quod reliquum est in carne temporis viuamus. Omnis autem spiritus qui soluit Iesum, ex deo non est, & hic est Antichristus, de quo audistis, quoniam venit, & iam in mûdo est.